



BOKO N° 05

A SONGS : DORCOS 20 3MWC

Saheli

URUWANDA:

N'i yi faso ci, i be sigi jonniti suma na ?

Awirilikalo tile 7, Uruwanda peresidan ami Burundi peresidan tora pankurun kasara do la. U selen Uruwanda awiyon jiginkene kunna, sorodasi dow ye u ka awiyon bon k'a bin. K'a ta o don na ka n'a bila bi la, patisagana dabora Uruwanda.

Awirilikalo tile 8 u y'u ka minisiri jemo faga, n'o tun ye muso ye, o don kelen u ye minisiri saba faga, ami mog'o caman were. Halibi mog'o t'a don sorodasi ninnu be min se. U be fanga de ka wa, siyawoloma kele de don wa, tipe na mogow dabali banna. Maa murutilen minnu be wele ko "FPR" mogow, mugu ni kise b'olu bolo sorodasiw kama Uruwanda bilama koni kera duurulen ye. Mog'o minnu sagara o be mog'o ba yirika bo. Dije seleke naani tonba ka mog'o wulila ka se Uruwanda, k'u be mogoyayi nini benbaliya in na, nk'olu desera.


Faraje dunan minnu be yen, olu caman y'u ka minenw ce ka bo Jamana konz.

U be ka pogon faga cogo min na, u be ka pogon faga ten. Aaa ! nin ko in gelcyara. Uruwanda kera jagaminen ye. Sorodasiw b'u son, maa murutilenw b'u son, bari marifa b'u bolo. Olu ni sorodasi be pogon faga la, nka min fana be fen in ke bili jagamiye, o ye mog'o wert gansanw fagali ye, minnu m'a bon, u m'a min. Bi koni Uruwanda, hadamaden be sosofaga, hali seninfaga te.

Eee, ni siyawoloma kele walima politikiko kele ye mog'o min bila k'i faso ke tomon ye, i be n'i jo don do ka wolo bugubugutu laje a kono.

Uruwandakaw bema hakili sor'o tuma min o b'a sor'o tile sera kunce.

Sebennijekulu



Uruwanda kele juguyara

DEN BALOCOGO


(ne 5)

SEGELE KELELI

(ne 8)

SAMORI TURE

(ne 11)



FILI DABO SISOKO NI DGCGC KURAPIYE

San 1945, nansaraw ye yelemba don u ka fanga taabolo la ka nesin farafin nw ma. Kabini o kera, farafin caman tun te siran nansaraw ka fanga je i ko folo. Folo-folo, ni nansara tunko mino de tun be ke. Hali kafo kuntiw yere fana tun te se ka ko ke min te ben nansaraw ma n'o te, u tun be lajigin ka mogo werew sigi u no na. Nka san 1945, Faransi y'a jini a ka farafinjamana maralenw fe u ka depitew sugandi, minnu ni nansara depitew be baara ke pogon fe Faransi depitesoba la. O depite minnu sugandira, mogosi tun te se k'olu jigin ka bo fanga la. Un nansara depitew bee tun dama ka kan fanga la. Nansara minnu tun sigilen be farafinna, nin ko in ma diya olu ye. Sundan (n'o ye Mali ye bi) depitew folo kera Fili Dabo Sisoko ni Mamadou Konate ani Zan Siliwanderi (Jean Silvandre) ye. San



Fili Dabo Sisoko

1947, desanburukalo tile 22, Fili Dabo Sisoko taara bo Segu. A selen yen, a ko k'a be si Kanpeman na. Jaa o te ke ! O waati Kanpeman

tun ye nansaraw damayoroye. Farafinw tun siyoro te Kanpeman ye. A don, Fili Dabo Sisoko ka miiriya tun ye ko ni nansara "gansan" yamaruyalen be ka si Kanpeman na, mun b'ale depitetobali ka si yen. Nin don Fili Dabo Konisira Kanpeman na. Dugujelen, a botola

ni nansara do benna. Nansara in togo tun ye ko Kurapiye. Segu dogotoroba tun don. Ale ye Fili Dabo Sisoko jate i ko baarakeden do. A y'i kanto a ma ko a ka ko do ke ; Fili Dabo ma hali a fan file yere. O ma diya Kurapiye ye. A dusu bora k'a kabakoya : Faama ka baara di baarakeden ma, o k'i ban k'o ke ! A dimiko jugu a binna Fili Dabo kan k'a bugo. Nka o m'i yere to a bolo. O y'a mine k'a sebekoro bugo fo k'a bilen. O y'a soron nansara do tun b'u kerefe ko Fe (Fay). Ale de nana u lafara. Fe ko Kurapiye ma ko tari a kungolo be yen wa ; ko mun y'a to a be kele ke depite fe ? O yoro de la sa Kurapiye y'a donk'a ye ko kolon ke.

Segukaw bolen kele kalama, a kera mankanba ye. U wulila ka se Komandan ma k'uka nisongoyajir'ala. Jama na, do k'uka Kurapiye ni Fe di ale ma, a k'u kan tige. Komandan ye Fili Dabo deli a ka sabali. A sorola ka nansara fila ninnu bila ka taa di gowereneri ma Bamako.

Kuma in nefolen gofereneri ye, a ma diy'a ye hali doonin. A ye Kurapiye bila ka taa kasol la Kati, ka Fe labila. O bee temennen kofe Fili Dabo sera gofereneri mak'a jin'a fe a ka Kurapiye bila, k'aleyafar'a ma; ko kele banna ale fanfe. Nka gofereneri ma son. A ko Fili Dabo ma ko sariya ye sariya ye ; ko mogosi man kan ka depite bugo hali n'a sorola a tigilamogo ye nansara ye. Desanburukalo tile 22, Kiritigelaw ye kurapiye ni Fe wele. U ko Fe ye min ke k'o te baasi ye. U ye alamandi bin Kurapiye kan kasoro k'a jir'ala ko n'a ye hali walejugu doonin ke nin kofe, a be bila tile 15 kasol la.

Nin bee diyara dugulenw ye nka nansaraw siranna. Uy'a ye k'a fo k'u ka tile waati banna. Gofereneriba min tun sigilen be Dakari, oye Kurapiye bila ka taa Dahome n'o ye Benin ye bi.


Kabini o don, farafinw y'a ye k'a fo ko demebaa b'olu fana na n'o ye u ka depitew ye.

Fatogoma Jara ni Hawa Fofana

Mali goferenaman taablolo Yiriwali siratige la

"Hadamadenya kono, sere bee n'a ka waati don. Fangaw be jongon falen falen, hadamadenw be yelema. Nka o bee n'a ta jamanandenw ni jamanaw be to u sigi yoro la." Goferenaman nemogo Iburahima Bubakari Keyita ye kuma ta jamana depite bulonba la. A y'a ka kuma kun tige ni nin kuma kora ma in ye k'a jira ko jamana ye fen barikama ye min n'a ka kan ka mine ni sebe ye jamanaden bee fe. A ye kuma taka goferenamanka taabolo fesefese jamanadenw ye yiriwali hukumu kono. A da sera faso yiriwali siraw bee ma kelen kelen ka fanga ka miiriyaw dantige minnu be se ka ke sababu ye ka Malidenw bee lafiya. Goferenama nemogo sinsinna keneya ni kalan kan kosebe. Kalan ni keneya te jamana min na, o jamana te bo nogo la sabu baara tow bee sirilen be nin fen fila ninnu de la. O la sa a ye wele bila maliden bee lajelen ma walasa bee k'i wasa don kalan ni keneya demeni na, olu ka se ka sabati. Nka mun be se k'a to ni nin bee be se ka sira sor? Goferenaman nemogo da sera o yoro ma. O de ye fo, demokarasiko min n'a donna jamana kono, an k'o matarafa. A ko a dalen b'a la ko pariti bee Aaniya ye faso joli ye hali n'a soru u taabolow te kelen ye. O la, a k'a b'a jini pariti nemogow fe, jongonfaamubaliya min be jamana kono, u ka je ka fu siri a dan na ka fo-ka-ben ke fanga jusigilan ye. A ko nin si te se ka ke fo sariya ka boli mali kono a ne ma, ka be dama keje fanga jekoro.

Job Tera.



Ni fijé tigera mogo la, i be dije to ; o te suyala ko ye. Fijé be cogo min nimaya la, ji be ten. Ji te yoro min na balo te yen. Ji ani fijé lakanakopuman ye nilakana ye. Ji be balo sabati cogo min na a be saniya yiriwa o cogo kelen na, sabula ji de be ke ka fen tow ko. Nka ni ji yere be saniya o te ko nōgomanin ye ; kerkenkerenya la ni ji caman don.

Kolosilila, Bamako jiko be maa kamana gan. O sababu ye mun ye? Jama ka ca, wa ji puman soroli man nōgo fan bee ani waati bee. Kamasorō bamakokaw ka magoran ji be sorō sira saba fe. Folo, o ye baji ye. Filanan ye kolonnaji ye.

Worobinejiye sabananye. Labanna ta in de ye ji saniyalen hakika ye, nka o te laboli Ke. Mogo keme sara la, bisabani seegin (38%) dōron de b'a sorō. A tow b'u mago dilan kolonnaji la. Negenw ni wuluwulujiw dun kelen be ka Bamako dugujukorōji duru. Ji in lanogoli kōrōmasurun ye mun ye? Kolon dōw be dugu in na u ji te se ka min.

Maa minnu fana te kolonji sorō olu dōw b'u nesin jolibai ma. Tijé don fen caman be bin baji la kamasorō a te fijen bil'a la. O be n'a ta an k'an hakili to jolibai ji la. Nōgo barika be ka bonya. O dun mana ke, ji in be se ka kasara lase a

Bamako ji n'a fijé duurulen don

minbagaw ma.

Jolibai ji tijenni be sorō yoro saba fe. Folo in ye ba damine yoro ye, Bamako ni san ce. Fenjanama fagalan minnu be ke senefenw na, sanji b'o tow sananko ka jigin ba la. A filanan o be sorō yan dugukonona yere la. Bagansuw ni kenema banankotaaw ani galajiw olu n'u nōgonna caman be woyo samiyeli fe ka don ba la. Sabanan ye iziniw ka jinogo filitaw ye. O kōni ye balawu damine de ye. Iziniw ka kan k'u ka jinogo sensen kojuman ; kasorō k'a bila ka taa ba kōn. Fijé ta ye jirituru ye ; sabula fijé sensenna puman ye jiri ye. A be fijé yelema k'a lakuraya suko ni duguje ce. Wa a buluw fana be gongon fanba kunben. Jiri turuli man gelen. Nka a turuyorō soroli ye baara ba ye Bamako bi bi in na. Fere minnu tun bilalen be sow ni nōgon ce yaasa o ka ke tijeduman mineyorōw ye, olu caman feerela dusannaw ma. Se maké minnu ma folo olu si fana labennen te.

Fijé ta fanfela la, Bamakosigi kera degun were ye. Anw te se ka janbolifenmoterimaw ko, nka olu be gongonbaw wuli, ka sisibaw fili. Misali la, ni mogo min ye kolosili ke wula fe k'i to Pōnze kulu kan, walima Badalabugu ta kan, i be sisi ni gongon de kelen ye kunnabiri ye Bamako dugu sanfe. O sisijuguw ni gongonw faralen nōgon kan, o be ke bana dōw sababu ye ; minnu be tali ke mura ni sisan bana ani

fogonfogonla bana caman la.

Furaw be se ka sorō fijé ani ji duuruli la. N'an ye ji ta jatemine ke. Forowmanamabōba ani kōdaw la, caman be bōposone ani angerew jiginta hake la baji la. O kōfe fo duguba kōnōmaaw i n'a fo bamakokaw, olu ka faamuya sorō ko dōw la. Anw nafala be sorō ji o ji la, o te se ka ke fen kolon filiyorō ye. Min ye iziniw kunkanko kibaruya ye, a ka kan ka wajibiyumak'ukajinogōsensēnkojuman ; kasorō k'a bila ka taa ba kōn. Fijé ta ye jirituru ye ; sabula fijé sensenna puman ye jiri ye. A be fijé yelema k'a lakuraya suko ni duguje ce. Wa a buluw fana be gongon fanba kunben. Jiri turuli man gelen. Nka a turuyorō soroli ye baara ba ye Bamako bi bi in na. Fere minnu tun bilalen be sow ni nōgon ce yaasa o ka ke tijeduman mineyorōw ye, olu caman feerela dusannaw ma. Se maké minnu ma folo olu si fana labennen te.

N'an ye jatemine ke hadamadenya yiriwali an'a netaakow ma, an b'a ye k'an ka dinelatige dulonnen don ji saniyalen ni fijé dumān soroli de la.

Hamidu Berete.

CIKELA KUNKANKO




Baganmaralaw ka samiyé kumbencogo

Bamananw b'a fo ko si-kongo-la tuma te da tumaye. Saheli boko naaninan na, an ye doonin fo baganw nafa kan : «misi sisan ni misinogo dilancogo juman samiyé fe». Samiyé ye waati korolen ye min ni nebila ka kan kosebe. O la sa, a ka kan, an k'an hakili to ko dōw la i n'a fo baganw labenni sanni a waati ce ; sanko an ka cikemisiw. O labenni in te dōwre ye u kisili ko.

Tije don, baganw ka dumuniko kóni be nogoya samiyé fe nka bana caman be soro o waati kelen in kóni ka da dugukolo nema kan. O nema de be ke sababu ye ka dō fara banakisew fanga kan, k'u kogo kosebe. Fije ni jiwoyow fanabe tila ka ke sababu ye k'u yerekeli teliya.

Feere fen o fen ka kan ka tige, o ye ka banaw kumben joona. Banaw yere bee n'u kumbencogo don. Kumbenni dōw be se ka ke ni sogoli ye, dōw yere be se ka ke kecogo werewla. Jine man kan ka ke fana ko kisili-ke-furaw bee n'u sarati don. N'o sarati dafara, fo kisili, ni dōw ko sogoli, o ka kuraya. Dōw ye san o san ye, dōw t'o bo, dōw yere be se ka caya n'o ye.

Baganbanaw ka ca. Misibanaw



yere doronna, damadown'utaamasiyen kelen kelen file :

- Berebila : Ale be were ci ka dugu misiw ban pewu. A taamasiyen dōw file : Sogosogo, kónoboli, njibon, nunjibon, dakonobosi, pasali, farikalaya...

- Konotinebana : Musomanw ka konotine be caya, u bobarayanfan be funu. Cemanw kurukunw be funu...

- Ntorenci : Farikalaya. Dakonona

nin toronw furancew be bosi....

- Bon : Kónoboli jugu,
Segelennibon : Segeleli,

farikalaya. Farikolo be logologo walima ka basi woyo a kóno.

- Jefedimi,
fogonfogondimi walima disidimi : Farikalaya, sogosogo, pasali...

- sogosogo : sogosogo kótingebali, farikalaya...

- Sumaya : dumunikebaliya, jolidogoya, segen, farisiwuli, disilogologo, dogodogo funu...

- Sumayafin : (misi ka sunçobana) pasali, farikalaya...

- Bobilenke : Ale ka ca misidenwa. A taamasyijew file : farikalaya, kónoboli, dumunikebaliya, yereyere...

- Bijedimi : Kónoboli, jolidogoya, ngono be funu i n'a fo ko buteli de b'a kóno.

- Kononatumu bana : pasali, dumuni caman dun, jolidese...

Nin bana ninnu bee kofe, bana caman werewbe yen. A dōwye yereyere bana, nperébana, pçsonidun bana, bugoliba bana...

N'an ye jatemine ke, an b'a ye ko bana ninnu caman ye fariganwy. A ka ca a la, u be se ka kumben ni sogoli ye. Bana kofolen ninnu caman bolen be nogonfe. Anye taamasiyen kelen kelen minnu kofe tan, a ka gelén n'a donbaa jenjen te, u ka se ka danfara. A donbaa jenjen dun te dōwre ye bagan dogotorow kó. A kakanoluk'a sementiya ko nin bana masina de be bagan banabaato la. Hali ni bagan kenema de fagara, a sogo man kan ka dun kasoro olum'a segesäge sankobaganbanabaat sabuhadamen ka bana caman fana be soro o walen in batobaliya fe.

Jine mankan ka ke fana ko bagan kisili do ye k'a tanga walisenefew ma ani ka toka waati d'a ma, a be lafije min kóno.

Alu Danbele,

LADILIKAN

Nin kuma in ye ladilikan ye min be tali ke foro kóno koorice kan. Foro kóno koorice kelen don a dama surafe mine ye an ka cikebugudaw la. Ni mogo min b'a fe k'i ka koori ce foro la bi, fo i ka jo sankilo 3 bo walima ba fila (2000).

Ni mogo min m'o di, e ka koori te ce abada ; kasoro koorice-foro-kóno ce man kan ni sara ye. A dabora de ka baara nogoya dugumogow ma.

Ne b'a jini Saheli baarada fe, a ka ke sababu ye ka ladilikan lase nemogow ma olu k'a laje ka fu siri nin walejugu in dan na.

Kasimu Samake

Kunnafonisében feerebaa Welesebugu

Saheli ka jaabi

Kasimu Samake ka ni ladilikan in ka kan k'an be son hakili la. N'i ye mogo ye ka surafen mine o y'a soro a dira i ma de. O la sa anw je te surafen minena la. An be jalaki bin a dibaa de kan. Dōw be soro dugu kóno, olu b'a fe u ka koori ka ce bee ta je. U b'u den ka surafen di baara in kebaa ma. O mana ke sijne kelen sijne fila, a be ke laada ye. N'o te ni bee y'i ban ka surafen di, a mana ke cogo o cogo, dugu koori fen o fen ka kan ni celi ye, a bee be ce.



KALAN NI YERENJABNA

Den balocogo

Denmisennin te sekakemogokoroba ye. O kumasen in be fo korolen, watiye koro don. A be fo fana ko kono te ko. O tuma hadamaden ka kan k'i ka fen dunta jatemine kosebe. Mogokoroba be ladamu yoro min, denmisennin ta y'o la temen an taa ye. Ola sa, demisen kakan ka labalo kosebe nka kopuman.

An fe yan bi, denmisennin bana ani denmisennin saya caman be soro dumuni dese fe. Bee ka kan k'i jija dumuni kana dese den na cogo si. Den ka dumuni folo-folo, o ye ba sinji ye. O nafa ka bon den kan ka temen dumuni caman kan. Ni den wolola, k'a ta leri naani na ka t'a bila leri tan joggon na, sin man kan ka d'a ma, fo n'a kasira sanni o waati folen ce. Hali ni nono te ba sin na, ji salasala min b'a la o nafa ka bon den kan kosebe. A jirala k'a fo, ko bana man kan ka den mine k'a to sin kan, wan'i yo ketoye, o b'a soro nogo do donn'a kono, n'ote sinji saniyalen don kosebe.

Ni ba bena sin di den ma aka kank'a tegewko, k'a sinko, ka den dawolow ni den tegko. Den wolo don, sinka kan k'a d'a ma sijne naani tile kono, n'o bor'a la don tow a ka kan ka sin min sijne woco (6) tile kono, o la sin be d'a ma lere saba o lere saba. Sin ni dumuni suguya were man kan ka di den ma ni su lere 9 sera fo ka taa a bila sogomada lere 6 la. Ji ka kan ka di den ma sin min waatiw ni joggence. Den koliji man kan ka d'a ma.

Ni den be sin min, ba man kan ka dumunifén kumunenw dun, a te dute min, a te kafe min.

Den mana se waati do ma, a ba sinji doron t'a fa fo ka dumuni kerengkerennen dow farasin kan. Odumuni ninnu be se ka ke sababu ye ka den daboli nogoya.

- Ni den ye dogokun 4 soro ka t'a bila fo dogokun 6 la, moniji ni seriji be se ka d'a ma. Nono, kogo ani sukaro doonin-dooin be ke moniji walima seriji in na ; nka nonodege sukaroma sen t'a la, wa bagannono min be k'a la o fana ka kan ka wuli folo.

- Ni den ye kalo tila (2) soro ka se fo kalo 3 la, jiriden ji be se ka d'a ma, i n'a fo lenmurubaji.

- Ni den ye kalo saba (3) ni tila soro, ka t'a bila fo kalo naani (4) na, nakonofenw be se ka d'a ma, nka u be tobi de k'u ji d'a ma ; o ye tamati, karoti ani komiteri ye. Nin bee ka kan k'a soro den delila moniji ni seriji la. O waati dumuni ka kan ka di den ma sijne 5 tile kono, moniji ka kan ka du doonin, a be se ka komitere tobilen terekelen dun.

- Den kalo duuru (5) sogo be se ka d'a ma, a be tobi k'a ji d'a ma (a be fo o fana ma ko buyon). O waati, sin be di den ma sijne 3 joggon tile kono.

- Den kalo 6 ka t'a bila fo kalo 10 na, o y'a kolow sigi tuma ye joggon kan. siyefan, ni jege, ani bije, ni sogo, ka fara jiridenw kan ninnu bee be don den ka dumuni na. Nin waati la, dumuni be di den ma sijne 4 tile kono.

Den baloli ka nogo kosebe, nka timinandiyaba de b'a la. Den nugu ma kogo i n'a fo mogokoroba ta, o de la dumuni suguya dow be yen a nugu te se k'olu yelema : i n'a fo to, basi, kini, syo, ani tiganinkurun. Dumuni silen fana man ji den ma. Dumuni doron te den balo ye, a ka kan ka bere-bere, k'a naani ka tulon k'a fe, ka tulonkefenw san a ye.

Alu Danbele.

Saheli baarakeda ye taama kerenketennen laben Mande kononana. Ani denmisén mugan joggon be taabo mande ka masala mande maakorobaw n'a serewisidaw baarakelaw fe. A ka ca a la caman ye mande tariki lakodon ; tariki koroba minnu be mande ni Ahaaraw y'a mincogo juman don n'u be joggon kalan a la. Nin taama in dabora de ka jamana don, jamana laada korow be cogo min, k'o don. Jamana si te ye min be yiriwa ni jamana were laadaw ye. An dun be mun kolosi bi ? An ka taabolo korow caman kelen be bolokofefen ye. Laadakow temennenka ka bo yen an b'an jesin yiriwali-keminewerew man'o ye kalan ni kenya ani sanudingew ye, k'olu taabolow jatemine kangaba mara kono. Taama in bema kuncé ni sebenni ye. Taamadenw be je k'u hakilinataw seben ka ke gafew. ye. O gafew be jensen kalansow ni balikukalansow la walasa bee k'i nimyore soro a la ani k'i hakilinataw fo a la.



KUNNAFONTW KAFOYORD

DUWAJEW BILALA MINEN MIN KONO U MA SE K'O FA

Duwañew tun ka kan ka sefawari miliyari 7 ladon faso kun san 1994 kalo saba fölow la. Nka u ma se ka foyi soro ni miliyarari 2 te. O jigitge bonyana Mali nafoloko minisiriso mögöw kan kosebe. A jirala k'a fo ko dewaliyason koson, Mali jagokelaw te minen caman san kókan bilen, ka na n'aye Mali kono. O-kofe, yurugu yurugu b'a tan ni fila fili la duwañew ka baaradaw la halibi, foyi ma se ka bo o la.

LAKOLIDENW KA LAJEBA

Bamako lakolidenw ye lajeba do ke Awirilikalo temenen. U y'a jira k'u ma son Lakolimisenninw dörön dayeleli ma, ka tōw to yen. U y'a jira k'u tōnogon minenenw ka bila sisan-sisan. U y'a jira, ko u tun ye tijeni min bojo, yasa sigikafé be ke, ka fura soro lakoli geleyaw la, ko o bena damine tuguni. Wa o fora cogo min, o kera ten. Awirikalo tile 29, u ye Bamako fan bee ke mankan ye.

MILIYON 35 DIRA NTOLATANNAW MA

Maliden minnu be kókan, olu ka ton peresidan ye Abudaramani Serifu Hayidara ye. A ye bonya caman ke ntolatannaw ye (samataségew)

-Kupu kabarl ntolatan waati la, a ye miliyon 5 di awiyon sara ye, yaasa Mali ntolatanna minw be kókan, olu be se ka na faso deme.

- Tunizi ntolatanba senfe Mali selen Tunizi la 2 ni 0, a ye miliyon

12 di samataségew ma. O kofe, Mali selen Misirajamana na (Ezipti) 1 ni 0. A ye miliyon 18 di tuguni ntolatannaw ma. O bee mana fara nögon kan, o be ben miliyon 35 ma.

SIRABA KAN KASARA YE MALI GINBA CÖRC

Maristikalo tile 26 temenen sögomada fe, nege ne 3 waati la, siraba kan kasara do ye Habibu Danbele soro, n'a be fo o ma Mali Ginba. A sen fila karila, an'a numanfe bolo. Furakeli kunfölow ker'a la Gaburyeliture la. Sisan furakeli tōw be ka ke Faransi dögötöroso do la. Habibu ko, ko sisan a dar'a a la k'a ye Mali Ginba ye. Bawo, Jamana nemögöw, ateriw n'a kanubagaw y'a déme kosebe kasara in senfe. Ala ka nogoya ke Mali Ginba ye.

KABAKODEN DO WOLOLA BURUKINA FASO

Cadi jamana kan, denjerenin do wolola ni "ARASULU" tögö sebennen ye a bolo kan. Aliman jamana kan, jirisunw y'a seben arabukan na, ko "Man si te yen fo Ala". Surikalo temenen in, Burukina faso, Ala y'aka sebaaya da kene kan tuguni.

Muso do jiginna filaninw na. Kalo saba temenen ko, a ketö k'u ko, a ye "ARASULU" tögö sebennen ye kelen farikolo la.

Faamaw ye karamögöw wuli ka bo Wagadugu kataa den in laje, uka ke seereye. "Masatala" ka taamasiyen do yenin ye, ka jönnin sen fila waju.

JINAN HIJITAA

Göferenamanka sirakan, mögo kelen ka wari bölen be ben sefawari miliyon kelen ani baa mugan ma (1020 000). Awiyonsara b'o la, so ni dumunisara, ani furakeli söngö fana b'o la. Kenyereye mögödöw ka sira kan, Makan taakasegin be ben sefawari ba bi kónonton ma (90 000), nka dumunisara ni furakeli söngö t'o la.

BANISIRALA :

CÉKÖROBA N'A MUSO

céköroba si ye san 72 ye; a muso be san 63 la. U furulen don nögon ma a be san 48 bo. Céköroba in ye a muso wele fanga la, bawo oko a ma, ko a be si a te sijne kelen dörön, dögökun kono. Muso ma son o ma minke u taara kiritigelaw fe yen. A ko be senna, jotigi ma don föl, jalakitigi kerebete.

NIZERI : POLITIKI WCÖ DÖGÖCMEL MINENA

Awirilikalo tile 16, mankanba do wulila Nizeri jamana kono. A kera Nizeri ka demokarasiko san kunben hukumu kono. Mankan in kónona na, mögo kelen sara, mögo 24 banana. Mögo 87 minena göferenaman fe. O mögo 87 la, paritipolitiki nemögöw be yen, minnu te fangakan fo n'a be weleko oposiyon. Depite minnu be mögo minenen nimmu na, depite birifini



farala ka bo olu kan, walasa fanga k'u no mine. Goferenaman hakilila o n'a ke sababu ye ka kow jukorola don.

O.N.U KELCEW TA KERA SEGÉN DAN YE

Dijé jamana yéremahoronyalénw ka tónba be wele O.N.U. Kalan ni ladamu sira kan, kóngó ni bama keleli sira kan, O.N.U ye koba caman ke.

Nka, min ye sitane (kele) dugali ye dijé kóno, a ma tógo soro o la fólo. O.N.U ka sorodasiw be wele "kasikibilew". Kele be jamana minw kan, olu be bila ka taa yen, ka don kelekela ni pogon ce, yasa balawu be dabila, k'a to ke sigikafé ye. O siratige la, "kasikibile" caman sara Bosini, o ye faraje jamana do ye, ani Somali ni Ruwanda, oluye farafin jamanadow ye.

O.N.U. ka sorodasiw sacogo ye makaritoko ye haali; bawo a be fo u ye k'u kana fólo ka mugu ci. E jolen be kelekela filani pogon ce, ko e kana fólo ka mugu ci; n'i y'a men ni mugu cira i la, i be i ta sara, o y'a soro kise y' i je. O de y'a to "Kasikibile" sebe dönnen te dijé kóno.

Ni kele ganna dijé fan min na ni O.N.U ma se yen, jalaki be bin a kan. Wa ni "Kasikibilew" taara fitine kene kan, n'u y'a ke cogo do la, a be fo k'u demena kelekela kelen fe, ka temen kelen kan. N'u y'a ke cogo do fana la, a be fo k'u nakun te keleban ye, k'u b'a fe ka jamana tigiya mine jamanadenw na. Wan'umafen ke fana, a be fo ko

nakun tun te u la kelekeyoró la, ko kelelajuguyalaw don.

WULUDUNNA DUNNA WULUW FE

Nin kera ce do ye ka bo Burukina ; a tun te sogo si dun ni wulusogote. A tógo tun ye Sanboka bo Wayiguya. Ni wulu sara n'a matoli, a b'o ta ka taa o dun. Ni mögo min b'a fe k'a ka wulujugu kun ci, a b'o mine ka t'o dun. A kera sa n'a be temen yoró o yoró, wuluw be wo wo ci a la fan bee. Wululakaw nana ajatemineko ce in b'a fe k'u silatunu. Don do la, dosokoró saba y'a bagabaga.

A ko a be boli, a ma möson. Wuluw y'u ke a kan k'a ni dijé fara. Okera Marisikalo tile 10 san 1994. Ce in ma mögesi soro k'a bo wuluw bolo. Bee y'i jok'a laje ten.

DO FARALA SISIKURUN TARANSIPORIW KAN

Dewaliyason kelen, fen tun ma fara Teren (sisikurun) taransiporiwkan fólo. Nka Marisikalo tile 1 la, dofarankan kera.

Otorayi taransiporiw

Bamako-Kati : kilasi 1 = 6.99 (keme 6 ni bi 99)
kilasi 2 = 4.08 (keme 4 ni dorome 8)

Bamako-Jamu : kilasi 1 = 1.684 (baa 1 ani keme 6 ni bi 8 ni 4)
kilasi 2 = 9.82 (keme 9 ni bi 8 ni 2)

Bamako-Kayi : kilasi 1 = 1.858 (baa 1 ani keme 8 ni bi 5 ni 8)
kilasi 2 = 1.084 (baa 1 ani bi 8 ni 4)

Esiperesi taransiporiw

Bamako-Kidira : kilasi 1 = 4.231
(baa 4 ani keme 2 ni bi 3 ni 1)
kilasi 2 = 3.103 (baa 1 ani keme ni 3)

Bamako-Dakaro : kilasi 1 = 5.382
(baa 5 ani keme 3 ni bi 8 ni 2)
kilasi 2 = 3.947 (baa 1 ani keme 6 ni bi 8 ni 4)

AFIRIKI "DU SUD" : FIJNE KURA CIRA

Afiriki "du sud" persidan sugandi daminenataratadon, Awirilikalo tile 26. Nisondiyako file, makariko file. N'i ye Afiriki "du sud" ta, jinan y'a san keme saba (300) ye, fanga be nansaraw dörön de bolo, uni farafin je te, o kuma yere tun te se ka fo. Farafinw ni tubabuw ka fen bee de tun faralen don ka bo pogon na. Siyawoloma barika tun bonyana kojugu. Tubabu be farafin syeninfaga, foyi te bo a la.


Tipe na domnikelaw b'a fo ko dijé ye yelema yelema caman ye, dijé te to bolokelen kan, o kuma ye tipe ye.

Bi Afiriki "du Sud" farafinw ni tubabuw be ka wote pogon fe, ka perisidan sugandi.

Wote ma ban fólo, nka daw be ka ben Mandela de kan, n'ale ye farafinw ka tónba do nemaa ye. Mandela yere ye san 27 ke kasol, tubabuw ka siyawoloma y'a sababu ye.

Aa; dakan sa te; mögów ka fóla, ale be son ka ke Afiriki "du Sud" Peresidan fólo ye farafin kunda. Wote in senfe, mögów neji bora, miiriw janyana, sabu mögo caman tun sigilen te ni nin ye.

Mahamadu KONTA, A.J. KULIBALI



ka bɔ segu

Marisikalo laban na dakabana kuma dɔ tun be Segu barokédaw bée la. Solomani si ye duurunin paranti ye. A bɛ bɔ Segu bamanankin na. Kamalenkɔrɔ kundama selen don. A si bɛ san 19 na. Kamalen in de file ka bin npogotigini san 4 kann'o ye Salimata Konate ye ka bɔ bamanankin na. Sigjnjögonya dɔw be laban ka kɛ i ko balimaya. O dɔ de file nin ye. Don dɔ, salimata bamuso ye Solomani bila ka taa npogotinin nɔfɛ Pelengana n'o ye Segun kin dɔ ye min be dugu kɔfɛ dɔɔnin. Sirafɛ Solomani binna dentani in kank'a jagoya lajaba. A kumataara bɔgɔjeninenkan. Sanni o don ce Solomani yere datugura Segu Kasobonba la.

Alu Danbele.



SEGELE KELELI

An ka jamana ye layidu ta k'a bɛ segele keleli k'a ban pewu sanni san 1995 ce. O kadara kɔnɔ, san 1988, jamana nemogow ye feerew sigi sen kan. O baaraw daminenā san 1990 Duwanza kafo dugu 68 kɔnɔ. San 1991, jininikɛlaw ka kɔlɔsili bɔr'a kan ko Mali mara 4 na, segele bɛ maa ba 16 de la. O b'a jira ko bana in ka ca an ka jamana kɔnɔ ka temen dije seleke naani jamana tɔw kan. San 1992, Okutɔburukalo kɔnɔ, segele keleli ye barika sɔrɔ ka d'a ka zenerali Amadu Tumani TURE sugandira ka ke a kelebole kuntigiba ye. Minisiriso 7 de sen donna bana in keleli jamakulu la. Sanni o wale in ce, an ka dugu 1255 minnu ni segele b'u kɔnɔ, keme sara la 6 dɔron de tun ye deme sɔrɔ bana keleli la san 1993 damine na. San kelen kɔnɔ sanni desanburukalo ce, keme sara la, dugu 74 ye deme sɔrɔ. Nemogow ye feere tige walasa jamana denw bée ka wuli ka jɔ an ka maraw bée be se ka kunnafoni jɔnjɔnw ni deme sɔrɔ segele keleli kama. O siratigela, Zenerali Amadu Tumani TURE yere wulila ka jamana yɔrɔ caman taama ka mɔgɔw ladɔnniya.

-Kai marala, segele banabaatow tun hake ye 5238 ye san 1993 la. Bi a tɔ ye mɔgɔ 123 ye.

-Kulikoro mara la, a tun bɛ mɔgɔ 20 na bi olu bée kenyara.

-Moti mara la, san 1993 bana in tun bɛ maa 6591 la, bi segeleto maa tɔ ye 142 ye.

-Segou mara kɔnɔ san 1993, utun ye maa 162 ye, bi olu fana bée kenyara.

kunnafoni nimmu sɔrɔla segele keleli kunnafonisében kɔnɔ





MIIRIYA JUMAN

Min ye jamana yiriwali n'a ka jetaa ye, A.P.S.I.B. ye jekulu ye min be baara ke o sira kan. A sigilen don Jikoroni kabini san 1992. Jekulu nin be juru don bamakɔ musow la, minnu be jagomiseninw ke, walasa k'u ka jago yiriwa. Baaradanin be musow deme wari mara cogo la ani k'u kalan bamanankan na walasa u ka faamuya sɔrɔ dijelatige taabolow kan.

An be don min na i ko bi, muso 206 de ye juru sɔrɔ Dontemé I ani Dontemé II kɔnɔ. Don nataw la an b'a fe ka baara lase Jikoroni sigibolo tɔwla in'a fɔ Jene kabugu, A b u d u l a y i b u g u , Mariyamubugu,...

Nka dijɛ baara o baara n'i b'a ke mɔgɔ minnu kama, a k'a sɔrɔ olu yere sen b'a la. Bawo bamananw ko : «mɔgɔ si kun te se ka di a yere kɔ», o la APSIB miiriya dara jenatige ka tɔn sigili kan. A ye tɔn misali ta G.I.E jigi kann'o sigilen be Hamidalayi. N'i y'a san fila ye "GIE Jigi bolofara n'o ye Besseye ye, o ye jenatige ka tɔn sigi sen kan walasa k'u ka baara kelen, n'o ye saniya ye ko sabati.

APSIB ye kalo fila hake ke a be jekafɔ ke Jikoroni kaw ni pɔgon ce ka tɔn nafa fɔ. A ye wele bila Hamudalayikaw ka tɔn jemɔgɔw

HADAMADENYA TAABOLO

ma. Olu nana u ka tɔn jɔyɔrɔ n'a sigicogo a n'a be nafa min lase sokala ma,

Jenatige ka tɔn jɔyɔrɔ ka ca :

- baarada si te se ka sigi kin kɔnɔ n'u ma pɔgon kuma pɔgonya.

- tɔnbækigelya bɛejatemine k'u jepini.

- A sen be don baara kura bɛe jepini na kin tɔgo la..

- A be taamadenya ke APSIB ni dugudenw ce. A be APSIB son hakilina caman na min be ke Sababuyek'u baarakə bolo yelema ka ben dugudemjaniya jumanw ma. Ube dugudenw fanakunna foni APSIB janiya la.

- A be kumajɔgɔnya sementiya sigijɔgɔn ni pɔgon ce walasa u ka kafonjɔgɔnya nafa don hadamadenya yiriwali ni sigiyɔrɔ ka jenatige sabatili kan.

- A be APSIB ka baara sinsin dugumɔgɔw yɔrɔ, walasaka layidu tiime.

Mɔgɔ minnu be don jenatige ka tɔn jefekulu la, o ye mɔgɔw ye minnu ladirilen don, u ka wale ka ni kin kɔnɔ, mɔgɔw be u lame kɔsɔbe.

Jefekulu be sigi jekafɔ de senfe, a mɔgɔ be sugandi kasɔrɔ a ma ke ni politikiko ye bawo anw ka baara ni politikiko te fan kelen fe.

Musa Taraweile

JEKATAAMA


"Sahélienne" ye jekataama min sigi sen kan n'a be damine awirikalo tile 28 na ka taa a bila mekalo tile 8 na, o nebila baaraw daminen a kabini sibiri, n'o tun ye awirilikao tile 23 ye. Jekataama in be ke Kaaba n'a makafoduguw la.

In'a fɔ a bolodara cogomin na, jekataama in kojew bɛe ka kan ka seben bamanakan na. O la, Saheli ye denmisew fara pɔgon kan, minnu bena baara in ke, ka u kalan bamanakan na Saheli yere sun kɔrɔ yan.

Baara in tile naaninan don, denmisew y'u jeniyɔrɔ fin kao se be. Karamɔgo yere nisondiyara sabu nin waati fitinin kɔnɔ noba yera baara la.

Taali ye kalo tile 28 ye. N'ka sanni o ce Saheli baarakela bɛe b'a senkun kan. Ko su diya be don fitiri la. O kuma ye tijɛ ye. Fen o fen ka di mɔgɔye, ib'amne ni bolo fila ye. Denmisew o, saheli baarakelaw o, bɛe cesirilen don walasa jinan ta in ka 1992 ta dan. Denmisen minnu ye jekataama in ke san 1992, mɔgɔ o mɔgɔ y'a nɔ ye, olu bee sɔnna k'a pɔgon madeli ka k'anw fɔlɔ. N'i ye baara fɔlɔ ke n'o jena, wajibi ye jijali ye walasa minnu bena ke kɔfɛ, olukanajigin kɔrɔlen jukɔrɔ. Saheli baarakelaw t'a fe fiyewu a ka fɔu ma sama o sama, katila k'a fɔ un ma sonsan o sonsan. U wulikajɔkun file nin ye. Wa sen mi b'u kɔrɔ bi ! Dusu min b'u la bi ka baara in foren, halil a fɔli sigate ne na ko jinan ta be je ka temen san 1992 ta kan.

BEREHIMA WULALE Segu



Soja walima nere ni walima syonin : balo nafama.

Syonin ye mun ye? Soja walima syonin ye sene fen ye min be ne tiga ni bamanan syo seneyoro la. Balo nafama don min be dun bee fe, denmisen fara mogokoroba kan. A songo ka nogon ni sogo, jege, nono ni fanw ye. A nafa ka bon kosebe ka temen nin dumuni folen ninnu kan, a witamini ka ca. Ni y'a kilo 1 dun, a b'i n'a fo i ye sogo kilo 2 dun. Syonin be balokojuguya banaw kunbe wa a b'u keneya.

Syonin suguya ka ca. Do be yen, o fara ye finman ye. Do fara jelen don.

Syonin be se ka ke dumuni suguya jumenw ye?

A be ke nono, gato, to, basi, sunbala, furufuru, akara, moni, fari ani dege ye.

Syonin be se ka bayelema cogodi ka ke dumuni ninnu ye? A ka kan folo i k'a fara bo a la. O bocogo file:

- N'a ka d'i ye, i b'a ke daga kono ji wililen na, n'a tobira doonin, i b'a bo, ka ji suma k'a kan, k'a congon n'i bolo ye k'a ko, k'a fara bee bo a la. Walimani y'a bo daga kono, i b'a ke kolon kono k'a foroki ka soro k'a ko ka je ikomi nerekolo be ke cogo min na.

- N'a ka d'i ye, i b'a daji su

2, tile 2. A fara be magaya. I b'a foroki kolon na walima i b'a congon kosebe n'i bolo ye k'a ko ka je.

A dumuni dow misali

Syonin nono : I be minen ne 1 ta syonin kise la. I b'a daji. N'a niginna, i b'a si wugu la walima jonsimansi na walima i b'a foroki kolon kono.

I b'o minen kelen in ne 4 (naani) ji ke barama kono, k'a sigi tasuma kan. I be syo silen k'a la k'a lamaga fo k'a kuruci. I b'a to a ka tobi. N'a be tobi, a be to ka kanga. I b'a suuru ni galama ye. N'a kanga tigera, oy'a moleny. Ib'a jigin, k'a sensen ni lilon teme ye walima fini jelen. O ye syonin nono ye.

A ka kan nono nin ka min tile 1 kono o yelere 24 jateye. Sukaro be k'a la. N'a ka d'i ye, i be kafe mugu k'a la.

Nono in nafa ka bon denmisenniw kan kosebe. A be se ka di den ma kabini a kalo 3. Syonin moniji : Syonin fara bo len kofe, k'a ko k'a je i b'a kise laja, kasoro k'a mugu bo kolon na walima jonsimansi na.

I be minen ne 1 syomugu ta, ka minen ne 3 jo (keninge, sajo, kaba, walama malo) mugu ta, k'o nagami, k'o ke moniji ye. I be

kumuk'a la ani kogo doonin. I be sukaro k'a la k'a di den ma. N'i b'a ke mogokoroba moni ye, i b'ayereke, k'a kise, k'a tobikomi moni be ke cogo min na.

Syonin to : O dilan cogo ka ca :

* I be fini kok'a je, k'a ke barama kono, ka tosege k'a la. N'o tobira ka mo, i be syomugu ke k'a fasa.

* N'a ka d'i ye, i be jo (keninge, sajo, walimamalo) muguke toseri ye ka syonin mugu ke k'a fasa.


* N'a ka d'i ye, i be syomugu minen ne 1 ta ka jomugu minen ne 3 ta. I b'o jagami k'o ke to ye.

Syonin basi : I be syomugu minen ne 1 ta, ka jomugu minen ne 3 ta, k'o jagami, k'o ke basi ye komi an ka basi be ke cogo min na, nogolan be k'a la.

Syonin sunbala : O dilancogo n'an ka nere sunbala bee ye kelen ye. I b'a ke barama kono k'a tobi fo k'a mo. N'a be tobi, jisuma te k'a la. I be ji ke daga do kono, ka sigi ta kofe, ka to k'o jikalan k'a la. N'a monna, i b'a to a ka suma sanni i k'a don toli la. I b'a ke segi kono, ka bugurije doonin yuguyugu a kan ni teme ye, k'a datugu kojuman ka su 2, su 3 ke.

N'a tolila, n'a ka d'i ye i b'a si wugu la, k'a ke pintin kono k'a wusu. N'a ka d'i ye, i b'a fensen tile la, n'a jara, i b'a ke barama kono k'ajiran, k'a ke kolon nak'a susu k'a mugu bo.

Madamu Taraweles Jelika Sise
Animatirisi PRB Baginda



TARIKI


SAMORI TURE

Samori wolola san 1830 Minianbaladugu, konyan mara la. A fa tun ye Lafiya Ture ye. Jagokela tun don. A batogó tun ye Masoroma Kamara.

Samori ye julaya damine k'a si to san 8 na. Siselakaw nana bin Minianbaladugu kan ka Samori to dugutaa senfe. U ye mögo caman faga, kamusow ni denmisew minen ka taa ke jönw ye. Samori ba tun be maa minenen ninnu na. Samori koseginnen ka bo a ka taama na, a taara Madina n'o tun ye Siselakaw ka galoduguba ye k'a jini u fe u k'a bamuso labila. U ma son. U y'a jini Samori fe a ka ke u ka sofa ye k'u juguw kele. O de kera sababu ye Samori ye jago dabila ka yelema ka ke keleden ye. A ye san wooro ke Siselakaw fe ten ka tila ka san fila were ke Beretelakaw fe. A ye kelekecogo kalan yen k'a feerew bee don. O senfe de fana atuubira ka ke Silame ye. Kabini o watiw la, Samori Aaniya tun te doweré ye kafiriw keleli ko.

Samori kera kelekuntigiba ye fo k'a tøgo bo kosebe. Bee tun b'a don. A sigira Jala. A beenna minnu tun be yen, olu ye sofaw d'a ma k'a ka fanga bonya. A ye konya jamana kele ka mögów bee tuubi. O kelen, a ni Siselakaw bilala jögon na. Olu tun b'a fe k'a kele nk'a ma son kele ma sabu a ka sofaw tun segennen don kojugu. A taara woroduguyanfan fe nk'a ma men yen. A seginna ka na Siselakaw kele. A sera u koro minke a y'i sigi Sanakoro ka ke yen faama ye ten.

San osan, dötun be fara Samori ka fanga kan. A ka sofaw nana caya. San 1873, Samori n'a ka keledenw donna Bisandugu ka yen ke u ka galoduguba ye. Bee tun b'a ka



Samori Ture

farinya don. San 1881 a ye Kankan mine, ka Madina fana mine. A sera Sori Burema na nk'a hinien'a na, a ma son k'a faga.

Samori ka jamana tun be bo worodugu ka se fo Joliba. A vere tun be wele Alimami. Mögów ka fo la, san 1886 la, sofa ba biduuru ani so ba naani tun b'a bolo; nka o bee la, a tun ma tila kele la. K'a to kele ninnu na, a nana jugu werew soro a yere la minnu fanga tun ka bon ka temen a jugu tow bee lajelen kan. O juguw tun te doweré ye nansaraw ko.

San 1881, nansaraw donnakita ka tatakogo jo yen. Olu tun Aaniya de ye ka farafinna jamanaw bee mara. San 1882, feburuyekalo kono, Samori wulila ka taa kenyerankaw kele. Kenyeran faama ye ci sama nansaraw ma Kita, k'u ka na a deme. Nansaraw sera Kenyeran k'a soro Samori ye tijenni ke ka ban nk'a tun ma bo dugu kono folo. A n'olu ye kele ke. U sera k'a gen ka bo kenyeran ka soro ka kosegin ka taa Kita. U koseginto, Samori ka sofaw tugura u k'o ni kele ye k'u segen kosebe fo Kita.

San 1883, feburuyekalo kono,

nansaraw sigira Bamako. U ni Samori ye jögon soro kele la yen fana. O de senfe sa, uye kele damine Samori ka dugu maralenw fe. O kelen Samori nan'a jatemine ko n'a ma ben jini nansaraw fe, k'a ka fanga tena taa je bilen. Okeson, a ni nansaraw ye benkan laben min b'a jira k'u te jögon kele tugun. Seben folo tigera Kejebakura san 1886. A filanan tigera Bisandugu san 1887.


Bee b'a don ko cefarin te se ka sigi yoro kelen. Samori nana kele bin Sikaso kan. O ma diya koyi! Alimami ye daga sigi sikasokaw da la.

Mögo te bo, mögo te don. A ye kalo 15 ke yen a ma se sikasokaw ma. O waati y'a soro a ka dugu maralen mögów tun murutilen don a kama. Alimami ye Sikaso toyenka kosegin kataa akajamanamögów lasuma. A n'a ka sofaw tora kele la fo san fila. A he fo o kele de ma ko bankelé.

Nansaraw nan'a kólesi ko nin ye Samori keletuma juman ye. Ola sa, u ye kele bin Alimami kan. San 1891, u ye Kankan ci, ka Bisandugu ci. Samori bolila ka taa koro fe. A taara senefow ni jula ani bobow kele.

O bee la, nansaraw tun b'a nofe halisa. A nan'a ye minke k'a fo k'a ni nansaraw ka kele in te sen banta ye, ko boli t'a je, a tun be yoro min a y'i jo yen k'i kanto ko Bolibanna. A tun b'a fe ka tata jo. Nka sanni o ka jo ka ban, nansaraw taar'a soro yen. Fosi majigin a kono tugun boli ko. A tun b'a fe ka taa Liberia nk'a ma yen lasoro. Nansaraw y'a mine Gelemu, Man kerefe (Kodiwari). O kera san 1889, seteburukalo tile 29. U y'a bilaka taa Gabon. A je ma da Lagine kan o kofe. A fatura Gabon san 1900 awirilikalo tile 2.

Fatogema Jara ni Hawa Fofana.



SEKO NI DONKO ANI FARIKOLO JENAJE

Farafinna Ntolatanba 19 nan kuncera

Kari don, Awirilikalo tile 10, Tunizi ntolatanba kuncera. Nizeriya ye kupu ta. Mali ye kunnawolo minw soro Tunizi, an ye caman fo o la ka ban. "Saheli" kono se kera an na ntolaci minw na, an da bëna se olu ma bi.


Zayiri sera Mali la 1 ni 0. O ntolaci in tun ka kan ka ke filaninbin ye, bawo "ekipu" fila bee fanga tun ye kelen ye.

Mali-Zanbi don, kele tijena samataségew bolo. Zanbi ye bi 4 soro, Mali ma se ka foyidon. Osara ka ke cogo di ? dabaliban ko ! Malintolatannaw yere de ye bi 4 ninnu bee laben, k'u di Zanbikaw ma, u ka u don. Kabako ! Madu

Keyita ye "finali" laben k'a soro an ma temen "deminfinali" la folo. "ka joro batige la, k'a soro i ma ko tige folo". Ntolatannaw dara u yere la kojugu. hali Mali kono yan, bee tun dalen b'a la ko Zanbi bee bugo hali a te geleya.

Mogo beko o kola, ikaiyere finew don folo, ka i janto i yere la. O de y'a to an sera Tunizi ni "Ezipti" la. Samataségew ni u ka "antereneri" jinenen o ko dörön, Zanbi ye an ke jintin ye.

Konowari-Mali kera 3 ni 1 ye. o ntolaci senfe, samataségew desera pepewu, k'a soro



Madu Keyita

kono warikaw tun be i n'a fo fali ku tigelenw.

Kumadace la, an be se k'a fo ko samataségew ye u se ke. Mogo dan ye i se ye. Ji be don ko la doonin-doonin. Baara dörön de ye tijey, garijegé b'o dafa. Ni any'o

faamuya, samataségew be taa je de, u te segin ko abada.

Mahamadu Konta.

Kadow ka tonbolofaraba min n'a be wele Gimadogon n'a nemogo ye Ambajo Kasoge ye, ale ye dögökun jenaje kerenkeren ka jésin kadow ka seko n'u ka donko ma. U ye wele bila ka taa jamanadenw ma walasa bee k'i wasa don an ka seko ni donko lakanani la k'a kisi turisiw ka tijeni ma. O te dowerye an ka sen köröw ko, minnu be sonya ka seere k'u bila ka taa ko kan jenaje in nemogoya tun be madamu

Adam Ba Konare bolo.

LABO LI KUNTIGI :
Sumayila Samba Tarawele

SEBENIJEKULU : CGCMEL

Job Tera

SEBENNI JEKULU :

Morilaka

Jokolo Adama Kulibali

Teyo Hageman

Sidalamine Ag Dohé

Alu Danbele

Fatogoma Jara, Hawa Fofana

LABENYORO : Sahélienne Avenue O.U.A. tél : 23-14-29 Bamako.

JADILANNAW :

Alifa Yaya Jara Mamadou Kumare.

Labugunyoro

Mali offset

Hake : 5000

JENSENCOGO : Sayidu Tarawele

ani Saheli jensenjekulu.

Saheli ye deme soro ka bo :

Plan Internationale

OXFAM. GB., UNICEF

Coopération Française yoro.